

育德堂外制

育德堂外制卷第四

趙汝愚復觀文殿大學士

朕慨念宗臣力扶王業安社稷以為悅夙高輔
翼之勲質鬼神而無疑可後哀榮之典誕揚綸
命敷告綿區具官某節挺松筠忠貫日月特立
獨行之操不愧古人至公血誠之心可任大事
自晉參於國秉實深慰於民瞻堂堂濟世之規
凜凜捐軀之義惟時烈祖遽反真遊承文
考與子之慈對越天地相冲人事親之孝保

又邦家爰命奮庸允資篤棐嗟權臣之媚疾挾
讒說以震驚謫處偏州僅踰中壽雖亟從於甄
復猶未免於蔽蒙惟人心不可以厚誣故公論
自然而昭白盡還職秩追責泉扃孚號明功破
一時之欺罔易名紀德垂千載之光華載疇子
姓之良簡在班聯之近以伸朕志以協師言噫
成王之任姬公隆禮於居東之後文帝之待周
勃釋疑於就國之餘義匪間於古今人適殊於
存沒尚惟英魄式監至懷

程驤贈通議大夫

朕量材而授任稱位以䟽恩禁近之臣尤所注意生則隆其體貌歿則申以哀榮具官某擢秀西州揚名上國慈祥之德見于民庸篤厚之風孚于士論輟自螭頭之直徃分閫外之權方賴蕃宣乃縈疾疢陟之次對許以歸休胡遽棄於脩齡忍愴觀於遺奏追崇命秩加賁泉扃尚其不亡監此休渥

王拙太府寺丞

自漢以劉敬成和親之約則使者之能否繫國體之重輕其來久矣爾氣志慷慨似其前人持書出疆能諭指意擢丞外府申命以行審而專對之宜遂我弭兵之利佇聞歸報適有褒嘉

薛極刑部員外郎

何擇非人何敬非刑固王道之常經而我祖宗所尤重也朕率循是意見於選授之間矧時郎闡豈以輕畀爾闡敏之質明習憲章三為理官見謂平允比疇部最復還故班未足以究爾

能也刑曹虛位惟爾宜之尚旣厥心以推朕哀矜之意

沈紡大理正鮑華大理丞

朕審擇吉人以寄庶獄雖進自科目以必試以臨民詳其器能次第而用爾紡生於相閥爾華奮於儒生而能明習刑書服職惟謹更淺旣久於焉序遷為正為丞蓋由是鄉用矣益脩爾事以稱朕懷

李孟傳福建提刑

朕欲省刑甚而化未能洽也閩於今為近地而其民輕悍喜鬪易陷于辟朕深念之思得其人以達其意爾剛介有守蔚為老成秉傳而南炳然風采凡閩俗之愛惡情偽講之熟矣易節而命寄以平反充爾之剛而行之以恕於朕省刑之志其庶幾乎

程準知寧國府

朕更化之初講求實政思得良吏分任大藩庶幾休養元元保固邦本爾豈弟之美夙著民庸

比以省郎徃司餉事宜勞旣久以疾祈閑朕固
不汝忘也宣城之組命以起家爾其孚朕寬恩
使民安田里選表之寵亦豈後於爾哉勉振家
聲以需渙渥

李好義贈檢校少保

昔漢襲衛霍備極哀榮至為起冢象所立功以
垂不朽今朕有良將遽沒元身追崇之恩豈嫌
於厚具官某賦資果毅秉志剛堅堂堂許國之
忠挺挺濟時之略唱明大義手殄逆臣克震先

聲坐却強敵遂還四郡以靖一方朕嘉乃勲勞
倚為蕃翰豈特折衝於蜀漢固將決勝於關河
而降年弗遐抱恨永已授鉞之寵寧足以旣朕
恩哉載錫憫章視儀亞保英魂未泯庶其監之
干震贈承務郎

自權臣擅開兵釁而以峻刑箝天下之口爾以
言獲譴奄及淪亡非朕意也追錫京秩用慰沉
冥庶幾孤忠昭于不朽

曾炎知婺州

昔漢宣帝始親萬幾選二千石之良期以政平
訟理之効循吏之盛信史稱之朕更化云初於
焉取則具官某恭儉惟德惓惓無華儒雅之風
家傳有自寬平之政民譽攸歸自去禁塗久安
家食肆稽輿論起畀銅符惟婺女之墟吾股肱
郡宿弊旣久財力未紓資我近臣繼任其事撫
摩撙節庶幾少瘳至於治著効聞入補公卿之
闕厥有常典朕豈汝遺

鄒應龍母封太恭人

朕肇正元良施澤海宇自升朝以上皆得榮其親焉具官某母某氏德著閨門行應圖史厥有賢子顯聞于時方登論思以輔儲極而爾及見盛事首被寵褒凡吾從臣其得同此慶者鮮矣尚祇顯渥益介壽祺

周虎授文州刺史

朕惟孝廟注意右科激厲作成如恐不及是以人物輩出燁然有聞朕親拔其尤付以重寄勲勞既著褒陟可稽具官某奮自諸生志存許

國選寘賓閣遂與驅馳惟歷陽當兩淮之衝為
留都之蔽而能率厲將士力挫敵鋒江面帖然
威聲遠震逮茲再歲敵以寢謀擢刺一州公論
惟允昔唐之武舉實得子儀功蓋當時名垂不
朽其勉充於爾志以追企於斯人

史彌遠母封國太夫人

朕肇正元良衍無疆之歷博施海宇推錫類之
仁矧時大臣厥有壽母載加榮遇用錫寵章具
官某所生母某氏冲懿之資和平之美篤生賢

子為時聞人股肱朕躬羽翼儲極既丕受於多
祉且親際於亨期曾不踰時游頒三命以協邦
家之慶以隆母子之懽永介脩齡式需嗣渥

雷孝友封贈三代及妻

故曾祖不仕新可特贈太子少保
大夫紀三廟古之制也朕登任輔臣推本世系
寵褒其先以明報本追遠之義蓋於古有合焉
具官某故曾祖某素履躬行推重鄉黨而不見
於用識者惜之慶鍾曾孫是生人傑顯聞四海

為朕股肱原所自來非積德之致乎追錫宮保
實本舊章尚使幽光昭于無斁

故曾祖母毛氏可贈和義郡夫人

故曾祖母毛氏可贈感義郡夫人

古之立廟皆祔以其配其所由來遠矣朕取此
義之追賁輔臣之先燕及閨門並崇三世具官
某故曾祖母某氏和順之德宜其家人孰啻其
年不逮偕老後毛氏改作嬪良士躬履積慶之
勤勞懿行令儀終始惟一遠顯于曾孫忠勞既多遂參大政載稽邦典疏

以郡封庶幾杳冥監此休渥

故祖贈中散大夫就可贈太子少

傳

朕惟士之立家傳至數葉久爾彌大者其積善
毓慶非一朝一夕之故矣具官某故祖某行義
之美見於鄉評不求聞知自安隱約一經遺子
始大其聞暨于生孫偉然特立更踐中外遂登
政塗報本之思可無褒典命之儲傳以顯遺芳
故祖母令人蔡氏可贈永嘉郡夫

人

朕載考經誼廣恩錫類以褒吾大臣之祖而又
及其內助使之匹休具官某故祖母某氏夙閑
婦儀允有常度篤於訓子以起其家爰及聞孫
為時哲士朕方登諸四輔資以有為錫爾郡封
厥有彝典九原未泯尚其享之

故父任左朝散郎贈通議大夫子
可贈太子少師

士之以儒起家兩世決科者亦既罕見矣至于

好德尚義退然無營約於其身以裕其子者可
不謂之難乎具官某故父具官某奮于詩書策
名當世而遲回州縣見謂安恬平生所懷曾未
究其用也厥有賢子經行著聞斥除朋邪為我
良弼雖爾身之不遇其收報不已多乎質諸舊
典秩以官師尚克有知猶足自慰

故母碩人廖氏可贈齊安郡夫人
碩人張氏可贈信安郡夫人令人
胡氏可贈咸安郡夫人

朕登用輔臣崇其禰廟以顯教忠之報凡在內
助皆與享焉具官某故母廖氏嬪于德門克謹
婦道而降年不永抱恨九原善慶所鍾顯于賢
子功在宗社譽在薦紳不有寵章曷慰追遠
封之大郡於禮為宜尚綏爾神益昌其祚

故妻令人葉氏可贈清化郡夫人
偕老之美古人重之有以淑女作配君子同勤
約矣而不同顯榮揆諸人心可無追錫具官某
故妻某氏柔淑之德順于舅姑質素之風宜其

家室而象服弗被魚軒弗乘惟吾輔臣蓋有遺憾爰䟽茂渥肇啓郡封尚克歆承以慰冥漠

妻令人李氏可封高平郡夫人

朕惟詩人陳賢妃正女夙夜相成之道蓋深致意焉故凡有立於國家者未有不資助於閨壺也具官某妻某氏女德協于圖史婦功著于蘋蘩申以敬共不忘警戒克相君子顯名於時爲國蓋臣是登近輔視詩人之所美亦何愧乎䟽封大邦惟禮之稱全爾懿美嗣有寵光

黃度太常少卿

昔我 仁祖篤仁忠良凡諫爭之臣陳義而去
閱時未久輒復召還朕更化以來庶幾斯志爾
氣全剛大誠造精微向登言責之司獨罄深長
之慮極論西事遏其萌芽力排權臣指其情長
見微慮遠如爾者幾人哉家食累年養德彌粹
清勁之節對于古人逮此來歸皓然華髮朕仰
稽 仁祖重有愧焉惟禮之教化也微而史之
勸懲也遠非我舊德誰其任之勉摠素懷以副

虛佇

汪達祕書少監

朕永念多慮聿新庶政惟有德之用舍繫斯文之重輕疇咨老成並加收召庶幾人心興起國體尊崇爾天稟端良家傳行義博學篤志歲晚不渝可謂直諒多聞古之益友者矣易退難進風節凜然來對昕朝論議剴切有臣如此豈不足以重斯文乎擢貳曲臺改命冊府與史官之筆削明一代之勸懲朕之用卿蓋自茲始其推

所學以對殊知

徐邦憲吏部負外郎

自權臣擅朝以言為諱至於妄啓邊隙動搖人心一時士大夫能為朕誦言其非者蓋寡矣爾奏最近郡召對便朝憂兵禍之易滋慮國本之未建惓惓納忠之意豈特鳳鳴朝陽而已哉朋邪蔽欺擯爾于外寄以餽餉賢勞著聞朕既收還大權茂摠遠慮以爾前日所論見於施行肆升郎省之聯俾與宮僚之選朕志攸屬人望具

劉允濟太常簿管湛大理簿

簿正於九寺未為高選然士之回翔州縣者進
列於朝蓋由是始其可以不重哉爾允濟天稟
之高立身無玷爾湛家聲之茂臨事有方惟禮
與刑國之所重茲庸分命列屬其間各修厥官
以副朕選掄之意

李孟傳江東提刑程準福建提刑

朕考論卿大夫之世取其嗣德濟美有材可稱

者而詳試之用惟其宜豈嫌改命爾孟傳爾準
皆以名臣之子嘗列於朝任以外庸允有民譽
詳刑宣化渙渥方新而孟傳以私自言重違其
志肆俾易地而以準代之惟孟傳之剛方可以
振風采惟準之寬厚可以謹平反勉適厥中則
為稱職

立太子文武臣封父母

朕正元良之位垂長久之基慶始宮庭澤施海
宇自升朝以上皆得榮其親焉爾壽考康寧逮

于祿養服我恩渥益蕃爾家

趙彥逾授觀文殿學士

參書殿之華夙耽儀於丞輔侍經帷之邃方注意於老成有嘉族屬之良載陟班聯之峻誕揚明命昭示至懷具官某器量閎深風姿凝遠忠存許國勲已著於鼎彝義不徇時望益崇于袞舄屬權臣之屏去喜耆德之來歸奉我燕閒摠而蘊抱豈特日資於講習固將有賴於典刑裨益為多褒隆可後惟 仁祖之任丁度田况若

哲宗之用孫固馮京莫不職在延恩列于勸
誦蓋眷留舊弼雖具有於成規而延訪宗臣乃
邈無於前比允為異數式表殊知噫上親貴仁
朕敢或忘於典學責難陳善爾其毋怠於格心
遠企昔人以永終譽

林仲虎知安慶府

淮甸之西舒為望郡自有邊事雖無鋒鏑之害
而科調亦繁矣宜得良吏以紓其民爾奮于右
庠以材自見出入滋久有勞可書選環衛之聯

往任撫摩之寄繭絲保障古人謹之尚悉乃心以宣德意

王容父加封

朕肇正元良施澤海宇凡通籍于朝者皆得榮其親也而况於嘗在論思之選者乎具官某父具官某履行溫恭隱德不曜發祥有子顯聞于時而壽考康寧克受多祉際會盛事與被寵章凡吾從臣得此同慶者亦鮮矣其祇茂渥益蕃爾家

王益之國博留元剛太博

朕博選髦士列諸師儒非獨資其範模訓迪後
進抑亦養望育德以為顯用之階爾益之性行
溫良爾元剛器度凝遠皆以文學重于搢紳造
膝納忠有言可采充爾之志其可以大受乎博
士之官姑云序進益昌遠業以副所期

鄭昉國子錄

教胄子之官始于有虞備于成周今泐草雖不
同爾其意未有異也爾夙為諸生藹然譽聞回

翔州縣亦既有年列職其間士論惟協往脩乃
事以稱選掄

史彌堅知潭州

連帥之寄統率列城其責非他有司比也大江
之右重湖之南任無重輕而期有先後易地而
授亦惟其宜具官某以許國之心蘊傳家之業
利器空於槃錯精明燭於細微而能持以謙恭
飾以儒雅顧方疇庸天府服采夏官而引嫌偃
藩瓜時未及非急於用材之意也長沙謀帥為

朕疾驅敷恩惠以撫善良明威信以戢姦暴革宿弊於既往弭後患於未然勉著外庸式符眷倚

沈誥授太中大夫

六卿分職之重允藉典刑三載考績之常具存法守載頒成渥以示至公具官某賦質不羣持心近厚夙更器使獨隆靜退之風再與論思每罄忠嘉之蘊方委成于民部適會課于吏銓序進文階增華法從夙夜匪懈固素簡於朕懷日

月為功諒未酬於爾志益思勵相以對眷知

曾漸贈中奉大夫

引疾乞身勉徇垂車之志輸忠報國忍聞易簣
之言矧方在於盛年曾未舒於素蘊永懷雅望
用錫憫章具官某精識過人清標遺俗踐履淳
實在孔門十哲之間論議開明出漢廷諸老之
右比與代言之選有嘉陳善之誠擢置貳卿僅
踰扶日朕方博延衆正率勵群工欣舊德之偕
來歎英材之遽逝追崇四秩以貴九原賈誼早

終顧孰詢於得失馬周不壽徒思見於儀刑尚
想令名克垂永世

吳獵授朝請大夫

十乘啓行方假事權之重三載考績式循法守
之常睠我近臣對於明命具官某受材挺特迪
德寬平寄以上流克著折衝之効付之全蜀允
資經遠之規惟望實之旣孚宜聲華之益振屬
茲會課爰俾序陞計累日之勞豈鄉素志攄濟
時之業乃朕深期勉究茂庸嗣頒殊渥

孟導知嚴州

朕視邦選侯俾宣德意惟嚴陵股肱郡而地瘠
民貧號為難治承流之任尤重其人爾世族之
良夙自修飭貳事天府遂踐周行察爾之材其
可以任人之所難矣往敷惠政朕不汝忘

呂昭遠知常德府

朕於中興以來公卿之世凡材美可錄者未
嘗不樂進之也惟爾大父光輔思陵勲在王
室而爾謹守家法克著民庸惟時武陵實為望

郡二千石之重朕豈以輕畀哉勉旣乃心以俟
簡拔

劉焞復集英殿修撰

朕惟祖宗待遇臣下未嘗不以功掩過務全
始終爾當乾道淳熙間以材自見出入中
外宣勞居多制閭南邦克平巨盜顧以微累抱
恨九原甄復之恩朕亦何吝服茲茂渥發爾幽
光

眉州褒忠廟加封

生不愛其死死而能惠其民蓋古之所謂烈士也爾昔攝令丹稜以忠衛國仗義擊賊至于殺身而能顯其威靈垂祐一邑廟食既久爰畀侯封尚宏爾休施于無斁

丘壽雋籍田令

惟爾父方以德望威名為國重臣折衝于外而爾器業之美得於家庭擢賓周行司我籍事亦以見朕好賢之意施及其子也往祇眷簡益充爾能

徐邦憲司封員外郎

古之教世子設官多矣而末有不專其任也今雖兼官顧可以期會簿書奪其從容開導之益乎爾經術通明論議堅正選由郎省勸講儲闡輔翼之功於爾有賴去繁就簡雖官聯不殊而屬任加重矣其體朕意永輸爾忠

李揆吏部郎中

朕垂意人材博采詳試內外遠近務適其平所以昭示至公期於責實爾稟資溫厚臨事疏明

比佐理官折獄惟允驅馳蜀道宣力有年朕固
不以遠外而汝忘也召登郎省越在銓曹其悉
厥心以贊而長朕將有考焉

陳剛大理司直

詩不云乎淑問如臯陶在泮獻囚儒者之事固
無分於彼此也爾夙以學行推于搢紳白首入
朝抗志無撓教刑之屬雖若不侔而據經決疑
亦君子所盡心者勉脩乃職以俟明揚

張興祖武學諭

朕數月之間招延蜀士且十餘人猶患其來之不亟也爾文學之美稱于一方命召有年乃今至止以蜀士在班行之少而得爾焉亦足喜矣分職右學往其懋哉

求揚祖司農寺簿

朕采諸薦論以登天下之材苟以能稱者無不錄也爾久勞州縣美譽日聞進列于朝克勤乃事農扈之重列屬其間勉充爾材以稱簡拔

陳自強韶州安置

宋由之為太尉漢嚴阿黨之誅元載之典中書
唐正姦賊之戮朕恪遵成憲優待邇聯雖二咎
之並彰固羣臣之同疾姑從貶逐猶示涵容具
官某晚玷班行未離選調徒以權臣之私暱驟
叨政路之寵榮德薄位尊第知既得而患失日
暮途遠奚止倒行而逆施已共紊於朝綱後助
開於邊隙肆為蒙蔽馴致驛騷人皆懷憂國之
心願輸忠愛爾獨徇營身之計專事貪饕賄賂
交于廟堂請託遍于州縣子孫紛競道路駭聞

朕方躬覽福威載明黜陟爰收還於印綬俾退
處於田廬國典未伸人言沓至惟舜流四罪蓋
深惡於不仁而周制九刑亦首懲於毀則肆稽
古誼仍酌近規謫以散官屏之偏郡以少舒于
輿議以敷告于多方噫設廉恥以遇臣朕固素
隆於體貌去仁義而懷利爾惟自抵於譴何往
省前愆毋重後悔

徐邦憲叙承議郎

朕懲干戈之禍思藥石之言分別正邪昭示懲

勸布諸天下使明朕心爾抱負忠純發以剛毅
方姦謀之始啓獨首論其非及邊釁之將成復
深陳其害請建國本以弭兵端見遠慮微極於
剴切使爾言遂用所利豈淺淺哉言路詆誣加
爾以罰士論之鬱兩歲于茲乃今來歸悉還故
秩且以近臣之疏特追讒者之官予奪之間公
道彰著尚殫忠告朕將有行

曹叔遠鄭昉太學博士

博士古官也自我朝尚經術崇教化而其任

始加重焉苟非英髦孰與此選爾叔遠見聞之
博抗志不羣爾昉文采之優操行無闕其為朕
講明經誼以迪諸生使菁莪樂育之風復見今
日則為稱爾職矣尚思勉之

林瑒國子正李琪國子錄

近歲儒林之官率選於掌故蓋養其資望而後
進之示不輕也爾瑒爾琪皆以美質多文稱于
士友其學進而未止翱翔既久命以同升往祗
厥官益懋爾業

傅伯成太府卿

列寺長貳不必並置也若夫財賦之司謹出入
察盈虛于以裕民足國則亦豈一人之所獨任
乎爾奮身儒科世濟其美久更器使蔚有材名
蓋嘗貳于九卿往司餉事矣詳刑甸服制閭海
邦威惠不偏聲聞日起長我外府大用之階尚
旣乃心以脩厥職

趙師翼復通奉大夫

朕加惠群臣記功忘過有不得已而寘諸罰者

甄敘之恩惟恐後也況於久在法從方任近藩
者乎具官某夙以材猷游更事任積其勞代登
與論思出入險夷壯志不改起鎮京口治譽日
聞茲略去於小瑕俾復還於崇秩勉思忠報端
有裨書

林拱辰浙西提舉

朕選拔能士詳試外庸或寄以鎮撫之權或付
以訊詢之事職守雖異倚任實均爾志意堅強
論議慷慨簡自班列往守邊城警遠方聞整暇

自若朕察其可用擢登郎闈遂躋禹閣之華俾
涖介藩之重而近畿將指復難其人載審厥宜
於焉改命聽辭寓直以成爾謙朕之用材顧豈
以彼此為間哉其體朕知一新風采

岳建等贈官

自有事于邊熊羆之士以死報國朕測然愍之
爾久服戎行晉列將校遇敵力戰不為苟生追
錫累階恩延于世忠魂未泯服此哀榮

趙彥珖降朝奉大夫

蜀士之計偕者泐流郡所當優假也爾分符隸
歸縱吏為虐士不堪其辱焉豈朕所以招來俊
茂之意哉奪爾一官以警來者

常楮宗正丞

士之進于朝者至三丞為高選矣非可用之材
見於已試孰使稱其任乎爾夙抱器能通知世
務雖承流二郡贊畫元戎而未究其用也晉丞
外府復佐邊籌登之司宗俾將使指凡兩淮之
利害其周訪而審察之歌四牡之詩朕方有待

陳革授左武大夫

朕愴 祖后之上賓謹 阜陵之歸祔疇咨親
信命以相攸厥既宣勞可忘懋賞具官某持身
謙順泣事周詳更任使以浸多守恪共而靡懈
貳我法從度于因山兆域之良龜筮胥協迄茲
復土神靈安安爰載考於舊章俾序升於華秩
尚祇隆渥益勵忠勤

朱欽則降朝散大夫

邊陲未寧糧餉是急方任吾事者不可以弗虔

也爾以列卿之舊起鎮近藩轉輸愆期豈朕所望姑從薄罰以警度邦勉飭官常尚期來効

趙彥衛湯巖起降官

守貳之臣朕所望以協濟郡事也爾等各徇私意紊我憲章辯訟紛然自罹于罰朕審別輕重異其去留往服寬恩毋忘循省

耿良祐降從事郎

獄吾所甚重也汝為邑尉會殺人之獄而驗視失實使得以出入其辭奪之二階以懲不恪

翟揖授保義郎

汝役于逆曦而能引義苦諫幾至殺身旌汝二
階益思自勉

楊沆授修武郎

爾給事宮省宣勞有年以疾祈閑勉從爾志賦
以祠廩秩于銓曹祇服寵光益思自力

田祖周授武德郎

爾世祿邊蕃以扞西土義不從逆効順于朝朕
惟寵嘉之進階三等錫以多儀其服恩榮益隆

報稱

育德堂外制卷第四

育德堂外制卷第五

趙彥逾授太中大夫

朕延進群英講明六藝惟三百篇之義久矣潛
心積十五載之勤於焉卒業朕乃親賢之重冠
于講誦之聯爰考彞章誕敷成渙具官某材推
當世學慕古人身事四朝已勲勞之茂著年
開八袞猶氣志之不衰比喜遄歸彌深矐倚朕
惟累聖之盛親近儒生中興以來登崇公
姓然未有以宗盟之耆老奉經幄之清閒均禮

輔臣通班秘殿蔽自朕意軼于前聞矧茲職秩
之繼升亶謂恩榮之特異噫緝熙光明之益朕
方竊企於周成切瑳磨琢之規卿尚勉追於衛
武欽承體貌式究忠忱

樓鑰授正議大夫

朕惟王道之盛始於脩身齊家而達於平天下
本原旣正風化流行詩人所稱絜然有序故樂
得俊彥與之講磨及此終篇可忘懋賞具官某
識窮千古學貫群書在朕初元嘗侍經幄切瑳

之益念之未始忘也起諸謝事冠于論思充養
日深德望彌重從容勸誦密罄忠嘉資而仁義
之言輔我緝熙之學肆稽彝典序進宏階朕方
尊所聞行所知以庶幾於高明光大之美所賴
於卿者豈有已哉尚悉乃心以成朕德

宇文紹節授通議大夫

朕惟王道之盛始於脩身齊家而達於平天下
本原既正風化流行詩人所稱粲然有序故樂
得俊彥與之講磨及此終篇可忘懋賞具官某

受材偉特造學精深自簡在於禁林已再陪於
講席比登勸誦往涖元戎雖陳善閉邪阻開讜
論而定功禁暴允籍壯猶任有內外之殊恩無
彼此之間肆稽舊典載陟新階朕方思戢干戈
務休戍役於出車杖杜之詩尤有感焉式佇來
歸以對休渥

倪思授太中大夫

朕惟王道之盛始於脩身齊家而達於平天下
本原既正風化流行詩人所稱絜然有序故樂

得俊彥與之講磨及此終篇可忘懋賞具官某
稟資剛毅蘊識閎深越在 紹興已與勸講凡
今法從孰有居其先者乎進列文昌人望收屬
攝事瑣闥國論以明侍我燕閒從容啟導言無
不盡於卿見之序進崇階厥惟舊典朕方尊所
聞行所知以庶幾於高明光大之美所賴於卿
者豈有已哉尚悉乃心以成朕德

章良能授朝散大夫

朕惟王道之盛始於脩身齊家而達於平天下

本原既正風化流行詩人所稱粲然有序故樂
得俊彥與之講磨及此終篇可忘懋賞具官某
學兼博約識貫精粗炳然華國之文允矣濟時
之器擢登宗伯入侍通英援古鑒今有勸有諷
雅頌之旨發揮為多爰考彝章序進密秩朕方
夙夜敬止緝熙光明推至誠與賢之心期日靖
四方之効勉輔朕德益輸乃忠

葉時授朝散大夫

朕惟王道之盛始於脩身齊家而達於平天下

本原既正風化流行詩人所稱粲然有序故樂
得俊彥與之講磨及此終篇可忘懋賞具官某
學窮閭奧識造高明徧儀言責之司備罄忠嘉
之蘊紀綱以振風采日新久侍金華從容啟導
以三百五篇之義反復勸戒獨惓惓焉爰考彝
章序進寔秩朕方夙夜敬止緝熙光明推至誠
與賢之心期日靖四方之効勉輔朕德益輸乃
忠

黃疇若授朝散郎

朕惟王道之盛始於脩身齊家而達於平天下
本原既正風化流行詩人所稱粲然有序故樂
得俊彥與之講磨及此終篇可忘懋賞具官某
賦資挺特燭理融明紀綱振于一臺風采聞于
四海凡所建白悉中事幾待我邇英盡規匪懈
雅頌之旨發揮為多爰考彝章序進階秩朕方
夙夜敬止緝熙光明推至誠與賢之心期日靖
四方之効勉輔朕德益輸乃忠

許奕授奉議郎

朕惟王道之盛始於脩身齊家而達於平天下
本原既正風化流行詩人所稱粲然有序故樂
得俊彥與之講磨及此終篇可忘懋賞爾天資
爽拔學術通明如川方增進修不怠侍我螭陛
期月于茲獻替之忠亦聞其梗槩矣一官序進
厥惟舊章朕方思戢干戈資爾專對佇歌四牡
以勞爾來將所以寵嘉爾者豈有旣哉

陳希點授中奉大夫

朕惟王道之盛始於脩身齊家而達於平天下

本原既正風化流行詩人所稱粲然有序故樂得俊彥與之講磨及此終篇可忘懋賞爾器資凝重論議正平回翔有年泊然自守右螭載筆物望所歸詩之所謂吉人如爾是矣一官序進厥惟舊章朕方愛爾之賢資以自近又俾發明經學以輔儲闡將所以寵嘉爾者豈有旣哉

王柟授朝請大夫

朕念兵之為吾民病故謹選行人持書鄰境期於繼好爾一再將命浸得其情勞爾之來進階

三等益祇乃事以稱朕心

張大猷湖南提舉

倉卒有事之際任在民社而慮及國家者固朕所嘉與也爾比分郡符實控荆蜀方逆曦以兵塞巫峽而爾能預為之防肆疇厥勞擢將使指往宣德意以稱寵褒

陳耆壽戶部員外郎

朕博取良大夫之世進之周行又使詳試于外養其資望以為大用之階爾儒雅自將克守家

法民庸旣著擢登郎曹而出乘使輶驅馳最久
肆稽僉論還諸舊班朕之試爾亦旣詳矣勉脩
職業以俟褒遷

劉穎龍圖閣待制

朕作新治功疇咨舊德起諸旣老以重朝廷其
有引疾陳情憫勞以事則必隆其恩禮示我眷
懷雖不强其來亦不使之遽退也具官某材優
一世名在累朝旣茂著於民庸亦日隆於人
望惟朕初載登之論思閱時未多浩然歸志家

食滋久勇于挂冠朕之於卿每念其用之未盡也屬時更化亟命遄歸胡恙未平尚茲堅卧逸以珍臺之祿冠于次對之班雖徇懇忱豈忘注想庶幾勿藥終為朕來

曹莊祕書丞

三丞均之為清望也石渠東觀萃天下之賢俊並游其間則丞之選為尤重爾質涵粹美學有師承儒林之官回翔幾徧稽古禮文之事亦既與於議論矣肆茲申命列于英躋其體簡知懋

充器業

陳武太府寺簿

朕收召群材取諸公論凡士之易退難進有聞于時者不遐遺也爾向以學行之美列官膠庠遠去累年安於處約僅脫選調往佐偏州一時搢紳皆歎其不偶也簿正外府顯用之階尚疾其驅以對來渥

楊次山追贈三代及妻

故曾祖贈太師追封衛王舜元追

封鄧王

古之大夫皆祀三世蓋推報本之義以原其福祚所由興矧后家之親使相之貴可無申錫以顯流芳具官某故曾祖具官某孝悌稱於閭門寬厚推於鄉黨貽慶于後有耀其光是生曾孫相我內治施及同氣祇儀台司自流溯源豈一朝一夕之致哉即其王封進之大國奕然三廟協美聯芳以詔後人其世世享

故曾祖母楚國夫人王氏贈陳國

夫人

朕永賴中宮輔成內治褒其同氣燕及前人並
崇三世之徽章允謂一時之盛典具官某故曾
祖母某氏玕璫協度圖史流芳積善於閨壺之
中收報於曾孫之遠至于魚軒象服追賁泉扃
重翟褱衣歸薦蘋藻則其發祥所自豈偶然哉
侑于真王登之大國惟禮之稱尚其享之

故祖贈太師追封鄭王全追封魏

王

士有隱德不仕私淑其躬而集慶于孫克享廟
食父前子後三世同尊者豈獨無以致然歟
具官某故祖具官某行修于家譽孚于衆而退
然自守不褻其華及茲再傳其門遂大師垣之
位王社之封朕旣以椒房之故游攷褒渥矣於
焉申命亦惟舊章九原有知庶幾來監

故祖母魯國夫人解氏贈鄧國夫
人

受茲介福于其王母古人推本之義於是見焉

然則祖妣之以孫貴獨不可以義起乎具官某
故祖母某氏理家以勤處身以儉蓋夙脩於婦
職亦克謹於母儀積慶流光萃于賢后既䟽茂
渥胙以國封肆其聞孫晉列使相載稽故典申
賁幽扃予以廣恩亦義之稱

故父任保義郎贈太師追封慶王
漸追封秦王

自我賢后正位中宮爰考舊章追崇禰廟亦既
錫之王爵陟于師垣矣今其嗣子參華鼎司罔

極之懷可無申命具官某故父具官某性資溫
厚履行和平善積於己而不求聞知業修於官
而自安卑約抱志弗究論者惜之有衍其祥是
生淑女贈典逮于祖考舊祉施于孫曾雖任姒
之家何以尚此其承朕渥永綏爾神

故母越國夫人趙氏贈漢國夫人
魯有壽母詩人頌之以為美談今吾使相之臣
母不逮養可無休渥以慰孝思具官某故母某
氏來自名門作配君子本之柔順申以敬共施

於其家克有常度降年弗永遺憾九原鍾愛之
深顯于今日女儷宸極男視鼎司洊錫愍章累
封大國懿魂未泯其克欽承

故繼母越國夫人孫氏贈漢國夫
人

朕推恩后家崇其禰廟以顯種德積慶之報凡
在內助皆與享焉具官某故母某氏來嬪德門
實為繼室躬履巽順備極勤勞承尊撫卑協于
內則而降年弗永遺憾九原鍾愛之深顯于今

日女儷宸極男視鼎司游錫愍章累封大國懿
魂未泯其克欽承

故繼母越國夫人張氏贈漢國夫
人

朕惟中宮追念母氏思有以慰其罔極之懷亦
旣錫之愍章封以大國矣乃今申命厥有故常
具官某故母某氏窈窕之資和平之美相其君
子終始無違婦道母儀嬋黨所敬是生賢女配
德姜任朕每誦周南至歸寧父母之章未嘗不

為之愴然也因其子貴載畀新封精爽如存寵
先是服

故妻成國夫人衛氏贈蔡國夫人
順國夫人郭氏贈衛國夫人惠國
夫人劉氏贈邢國夫人

偕老之美詩人蓋樂道焉有以淑女克相其夫
同隱約於先而不同顯榮於後可無追錫以慰
永懷具官某故妻某氏德配珩璜敬存蘋藻躬
履勤儉以宜其家而翟第弗乘副笄弗被肆時

君子登使相之崇而弗及見也乃疏新渥晉昇
名邦用賁幽局尚其來享

任希夷知湖州

朕審擇良吏分任俟藩使之休養元元以銷歎
息愁恨之聲吳興股肱郡固不以輕畀也爾奮
自儒生嘗書縣最材行之美推于周行承流此
邦無以易汝往宣美政以稱朕懷

黎行之授宣教郎

武興之變爾能奮不顧身詰責逆曦為陳大義

亦可以為難矣拔之選調通籍審官勉堅素懷
益充遠業

曾喚刑部侍郎

朕深惟累聖遠監百王闡仁義公恕之規法
若畫一致忠愛哀矜之意民自不寃宜得儒臣
以司臬事具官某處心近厚秉德有常籍甚家
聲想風流之未遠藹然士譽嘉涵育之彌深比
持橐於禁塗肆分符於名郡甫聆奏最乃遽祈
閑朕方並進老成一新治理爰正貳卿之位乃

參太史之聯惟成憲之具存顧群情之未格欲
推欽恤允賴明清三又然後制刑蓋前王之所
重片言可以折獄亦君子之所難尚悉乃誠以
期予治

李孝純開府致仕

授鉞齋壇已極武階之峻垂車里第爰參台路
之華恩素厚於親親位宜隆於貴貴惟國之典
非朕敢私具某賦質和平持身恪謹將門襲
慶獨懷謙抑之恩威晚聯芳彌謹滿盈之戒自

陟元戎之重選加尉府之崇率禮無違小心匪懈朕永懷長樂載篤外家方允賴於輸忠胡遽祈於謝事勉從雅志申錫寵章大纛高牙有煥節旄之舊繡裳赤舄聿瞻物采之新往對光榮益綏福祉

劉崇之叙朝議大夫

朕操八柄以馭群臣凡譴何之重輕牽復之遲速必稽諸公論察其事情不使其或過也爾夙懷氣槩志在驅馳總餉西州有勞可紀武興之

變四路震驚爾之去官雖於義有愧然視夫頌
元戎之寄者豈不大相絕哉奪爾三官姑伸國
典今行臺條爾本末徹于朕聞揆事原情固為
可亮亟從甄滌復何疑焉尚堅素心以期後効

葉翥贈少保

任參四輔夙資勲相之忠位陟三孤載舉追崇
之典誕敷明命以示永懷具官某厚德有容通
材無滯久司邦計周知財貨之源流屢奏民庸
洞究閭閻之疾苦越予初載咨爾老成冠諸等

案之聯委以樞機之寄雖名遂而身退顧齒宿
而意新列職紫宸表寵光之特異放懷綠野想
神采之未衰胡不憇遺為之慨歎乃惟亞保允
謂貳公爰疏告第之恩以顯傳家之美噫出入
中外孰如四紀之賢勞終始哀榮亦曰一時之
殊遇尚其精爽克對休嘉

丁煜大理正留晉評事

折獄議刑之任非習知其事者不可以嘗試也
爾煜爾晉皆以法決科嘗列于理官之屬肆頒

新渥俾復舊聯尚其欽哉以稱甄拔

皇子埴追封肅王

慶衍本支甫協熊占之吉愛隆禋祿俄興駒隙
之嗟顧脩短之何追尚哀榮之有託肆頒愍冊
以寓悲思故皇子某秀出天潢祥開帝武宗
祧垂祐方欣彌月之不遲家國同休共冀降年
之有永胡未周於歲律遽永闕於泉扃慨想英
靈允懷傷惻爰稽舊典載酌僉言錫盾雕戈煥
節旄於兩鎮繡裳赤舄均禮秩於三公爵以真

王胙之成國以厚飾終之義以明慈幼之恩尚
其有知服此休命

柯甲大理寺丞

寺監之有丞均也而任之重輕少異矣爾回翔
州縣浸踐班行再轉為丞越在匠監顧事之簡
豈足以舒爾材乎往佐理官庶幾自見其脩乃
職以達朕仁

黃中著作佐郎

祖宗之盛以科第進人然必其器業之優行

誼之美則馴至大用人無異辭爾射策廣廷先
于多士養德屬操望實浸孚一時薦紳皆惜爾
之去而喜其復來也則朕之進爾豈直以科第
哉姑踐舊官以俟簡拔

劉元鼎授武節郎

師旅之餘頑民挾黨肆暴為吾赤子害徃徃州
縣莫敢誰何爾統我六師兼領邊郡能設方略
誅其渠魁威令既伸一方按堵旌之三秩以顯
雋功其對寵光益思報効

葉簣江東提刑

內而列卿外而部使者蓋人材出入之途而考績責實之地也爾家聲之盛吏道之優比由郎闈將指近甸臨事惟謹折獄以寬肆疇爾能還之近著而久安平進復即外庸大江之東其俗視浙右無異也寓直遽閣以寵其行益旣乃心亦豈久外

吳漢英太常丞邵衮太宗正丞

周禮樂之任屬諸春官而辨三族之親疏亦掌

之小宗伯事關於教化孰非王道之所重乎爾
漢英儒雅老成爾哀詳練謹飭更踐中外蔚然
有聞分命為丞各揚其職合敬同愛之美睦宗
敘族之恩蓋於爾有資焉欽哉毋忽

程覃軍器監主簿

詩之稱曰凡周之士不顯亦世士之能世其美
者國所嘉賴也爾伯仲競爽不替家聲嘗佐大
藩爰有朝蹟簿正之列姑以次遷益懋猷為以
需器使

伯羽贈開府

昔在 裕陵追崇 藝祖世推尊屬以續王封
存則隆親睦之恩亡則厚哀榮之典永懷宗老
式舉邦彝具官某稟資溫良持身恭謹本支八
世蓋輩行之獨高壽考九齡伊典刑之有在自
膺繼襲允賴藩維方精神之尚強宜福祿之未
艾胡縈微疾遽歿元身錫以徵章儀軼三司之
貴胄之茅土爵居五等之先尚克歆承以慰冥
漠

黃景說知靜江府

朕念廣右去朝廷遠吏可玩法徇私不善撫民
夷易以貽患思得廉正寬靜之士以鎮臨之爾
州縣積勞班行平進遠將使指民譽日聞朕用
嘉之寵以因任屬茲謀帥輟爾而西爾其審寬
嚴之中考利害之實宣吾德意洽於遐方益振
其聲則予以懌

楊濟潼川運判郭公燮提刑

自有事于邊蜀民益困朕為之惻然興懷是以

謹選循良付之使事撫摩矜恤庶幾有廖爾濟
儒雅之風譽在三館爾公燮豈弟之政惠在兩
州采諸僉言並畀一節司存雖異封部則同其
協爾忠以承朕志

張訢廣東運判廖德明提刑

朕惠州縣之吏不知養民力重民命也矧遠而
嶺外徽良使者孰與革此弊乎爾訢通練之才
方將隆指爾德明介直之操數宦旁州遠民之
利病戚休講之詳矣或就陟將漕或擢寄祥刑

其思寬恤之方以稱朕不忘遠之意

朱皆工部郎中

朕甚重尚書郎之選雖嘗試外庸亦必有列于
朝循序以進其起家而命者蓋鮮矣爾名相之
孫老於世故三紆郡組民便安之而自逸真祠
歲月滋久以爾不汲汲於進也可復難爾之進
乎亟其來歸對此殊渥

毛憲將作監丞

朕累月以來收召耆舊蓋略徧矣而博詢兼取

猶恐或遺爾身事 三朝名聞多士回翔中外
二紀于茲奏最南州退安家食推求舊之意亦
豈容遺爾哉來即故班嗣有新渥

張孝仲軍器監丞

二監最號事簡自長而下雖闕勿補可也顧儲
材之地亦奚可省員乎爾器業之優夙有譽問
驅馳蜀道浸見民庸戎監為丞嚮用之始往即
乃事勉充爾材

王庭芝降奉議郎

二千石之任朕所望以潔已奉公牧養元元也
爾發身儒雅素官于朝徃守近藩亦且再歲胡
不自飭以貽臺評貶秩罷歸毋忘退省

袁桂授朝奉大夫

武興之變於出處去就之際可以觀人矣爾懷
組家食義不受汙勇于挂冠士論所重增秩之
命予以示褒勉充素懷益昌遠業

汪端中知宜州

朕深念遠民思得習知其土俗者以惠養之爾

從事桂林能贊其帥肆因薦論就昇郎符勉布
寬恩母以遠外為問

趙夢極守給事中致仕

廣招徠之路方並進於諸賢隆止足之風顧孰
留於一老重違雅操爰錫寵章具官某實德在
躬冲襟容物持心平易率由君子之中遇事激
昂允有仁人之勇自膺簡拔浸著猷為游吾父
子之間盡爾君臣之義登之瑣闥處以宮端朕
惟灼見其純誠人亦咸期其大用胡然一疾遽

及累旬雖曲示於眷懷曾莫回於歸志乃踰常
比疊進密階垂車而傳子孫諒永彰於令聞散
金而娛故舊徒緬想於清規尚嗇精神以需福
履

陳舜申校書郎

三館儲材之地不容計日月也而遷進之遲速
亦必視資歷之淺深爾學富材優嘗書縣最來
官壁水遂陟蓬山半歲于斯寵以序進其充爾
素以對簡知

真德秀留元剛正字

朕惟祖宗重三館之選廣延俊秀養成其材
以為數十年之用得士之盛朕嘉慕之爾德秀
過人之資論議英發爾元剛傳家之業識慮深
長明試以言並輸忠讜盛年壯志其進未量益
懋厥脩以副朕期待之意

史次秦改奉議郎

士不幸遭時之變而去就之際凜然不奪志者
可以為賢矣爾為郡文學力拒逆曦之招熏目

潔身以全其節拔之選調通籍審官勉充素懷
益昌遠業

張宗濤循文林郎

崇陵復土既有年矣而朕之思慕未忘也爾以
下僚嘗服其役書勞受賞朕何吝焉

馮端方等轉官

朕永懷 祖后歸祔 阜陵爰命漕臣分董其
事爾與于奔走宣力為多晉之一階示不忘報
韓休等轉官

朕永懷 祖后歸祔 阜陵爰咨環列之臣往
泣因山之役爾與于奔走能服其勞寵以一階
示不忘報

張宗尹等轉官

朕違 壽慈之養悲慕無窮爰命侍臣典司喪
禮爾與于執事能服其勞增秩之恩夫豈汝各
周奕等轉官

朕永懷 壽慈既襄大事遠日之卜汝實司之
寵以一階尚思忠報

劉紹祖授脩職郎

朕永懷 壽慈敬襄大事首命法從往按因山
爾與于驅馳服勞不急一階之寵亦何吝焉

趙善防直閣致仕

朕博選宗英歷試中外其或用之未盡引疾乞
身必有襄嘉以昭睦記爾和平之質通敏之材
登于郎曹寄以天府蓋駸駸鄉用矣而浩然勇
去昇節南州均逸未幾力祈謝事於朕用爾之
意有未足焉遂閣之聯命以序進勉祇茂渥尚

衍脩齡

任公壽雍遯轉官

敵騎犯邊人情畏沮汝服在郡幕而能守職不
去以宣其勞遷秩示褒益思自奮

卜涇葉葵授脩職郎

朕違 壽慈之養悲慕無窮日月有時旣襄大
事汝以小吏與服其勞增秩之恩朕豈汝吝

育德堂外制卷第五